

OESTYD

LAUDIUM

Die Laudium Outreach Group (LOG) het op Sondag 2 November vergader in die Charisma Kerk ('n gemeente van die Reformed Church in Africa – dit is een van die dogterkerke van die NG Kerk wat gerig is op die Indiërbevolking). Die vergadering het die heeldag aangehou en was goed verteenwoordig. Van die ander christelike kerke se leiers het dit ook bygewoon; so die visie om saam hande te vat met die uitreikwerk in Laudium, is besig om te realiseer. Johan Naudé van NG Moreletapark is aangestel as voltydse evangelis. Daar word binnekort begin om die EEIII evangelisasiekursus so te skryf dat moslems spesifiek daarmee bereik kan word. Daar word ook beplan om weer opleiding te gee vir uitreike onder moslems en hindoes (meer in die volgende Oestyd). Bly asseblief ernstig bid vir die Here se seën vir al die uitreik- en opheffingswerk in Laudium; dat die Here manne en vroue sal stuur met harte wat brandend is vir Sy saak.

MOSAMBIEK – Allen en Ansie van der Merwe en Gurue Radiobediening

Omwiwa Yesu 1 jaar oud!

Donderdag 13 November 2008 – Omwiwa Yesu se eerste uitsending. “Ons het lewendige lugtyd gekry vir die dag en mense kon inbel en vrae en antwoorde oor die lug hanteer. Die wonderlike is dat die gratis tyd geskenk is Radio Gurue. Al die oproepe was positief en almal se dankie dat hulle versterk word deur die programme en bid dat die projek nog lank sal aanhou. Daar was geen negatiewe oproepe nie, die briewe stroom steeds in. Ek het 'n groot bruin poeding gemaak, die Mosambiekers het dit baie geniet, hulle hou mos van soet. Allen het 'n kas koeldrank gekoop en ons het lekker partytjie gehou. Ons dink dit is dalk 'n oop deur vir nog lewendige uitsendings, ons bid dat dit wel die geval gaan wees.”

Woordskool

Skool gaan week na week aan. “Daar was hierdie week ses outjies in die skool, en Allen het al by Woensdag klaar gemaak met die boekie, die ouens groei ook baie mooi in hulle geestelike lewe. Allen het die preek oefeninge wat hulle in die klassie doen, geskuif na hulle stilte tyd in die oggend en nou gaan dit ook vinniger in die klassie met die lesse. Hoe meer hulle verstaan hoe minder vrae is daar en Allen se dit is regtig 'n groot seën om te sien hoe hulle groei.”

Reën, wonderlike reën, water in die krane...

'n Paar weke terug was dit so droog, en geen water op die erf nie. Allen en Ansie het uit 'n skotteltjie gebad. Selfs die woordskool het tot stilstand gekom. Maar... nou het dit lekker gereën en alles/almal lewe weer.

Rondloopstories

Vele sendelinge (ook in Welmans se tyd) was beskuldig van mens-eterij. “Die nuutste storie is ons het 'n pastoor opgetel en huis toe gebring en hy is nooit weer daarna gesien nie.”

Ruilkoers maak ons lam!

“Ons diesel kos nou R19.70 per liter, ons gebruik die kragopwekker nou net om water te pomp, Ons kan net nie meer bykom by al die uitgawes nie. Ons het vir die eerste keer in weke 'n klomp appels op die dorp, en ek is mal oor appels, dit kos R3.90 vir 1. Ek kon dit nie oor my hart kry om soveel vir 'n middelmatige appel te betaal nie.”

Vragmotor blok die brug

“Ons het Vrydag oggend bietjie uit gery na die stukkende brug toe, dit het nou geknak. Daar is geen manier is wat ons daarvoor sal kan ry by 20 November nie, ons sal ompad moet ry.”

Onverwagse kuier in die dorp

“Gister het een van die radio programmeerders, Adolfo, se vrou hulle dogter se baba vir my kom wys. Ek besluit om hulle terug te neem dorp toe, en in die dorp besluit die dogter ek moet by haar kom kuier. Ek parkeer die bakkie toe langs die pad waar sy bly, of waar ek gedink het sy bly, en daar stap sy vooruit met die voet paadjie teen die berg af. Ek is vreeslik versigtig agterna, met die gedagte van 'n gebreekte enkel vars in my geheue. Naderhand het sy my aan die hand en sleep-help my al agter haar aan. By die huis gee sy my 'n stoel, druk die kleintjie in my hande, en daar sit ek en die ma oorkant my bewonder die storie. Ek het toe maar 'n rukkie gesit. Later het sy my toe aan die hand weer teen die berg uit, ek was stokflou en vol stof toe ek weer bo uitkom, ek het 'n stort baie geniet. Dit was my eerste keer alleen in die dorp tussen die huise sonder Allen.”

Heeltyd stilte, en dan weer baie kuiermense

Ons het eendag vir Mike Peens ontmoet, 'n oud-Zimbabweër wat werk met “Farming Gods way”. Hy werk 60km van hier af, baie eensaam, ons het hom genooi om enige tyd oor te kom as dinge swaar gaan. Hy en Allen kuier lekker en kyk saam sport. Hy gaan vir die volgende 3 jaar in die omgewing woon en werk. Miskien moet julle saam my bid dat hy 'n vrou kry dan het ek ook 'n kuier-maat. Grant en Riana van Muapula en hul 2 kinders het hier oorgeslaap Vrydag en Saterdag aand, en Louis en sy seun van Chiconono het Sondag oorgeslaap. Mike het ook Saterdag en Sondag gekuier, die huis was vol!

Voorlopige Verlof program

(Sekere afspraak moet nog bevestig word.)

- 19 Nov: Vertrek en kry verblyfpermitte vir die volgende jaartermyn op Quilemane.

- 20 Nov: Ry verder af na RSA
- 23 Nov Witbank Klipfontein
- 30 Nov: Delmas Moedergemeente
- Desember: Vakansie in die Kaap
- 4-11 Jan: Witbank-Klipfontein gemeente
- 18 Jan: Klerksdorp-Suid gemeente
- 25 Jan: Klerksdorp Doringkruin
- 1 Febr: Stilfontein-Sentraal gemeente
- 15 Febr: Kroonstad-Oos gemeente
- 23 Febr: Rietfontein-Suid gemeente
- 1 Maart: Delmas Moedergemeente
- 7 Maart: Witbank Klipfontein
- Terugkeer na Mosambiek

BID VIR

- Die pad af na RSA: dat die voertuig sal hou, dat hulle gemaklike slaapplek langs die pad sal kry.
- Dat die ingee vd die verblyfpermitte goed sal afloop.
- Vir 'n goeie rustyd en hersteltyd vir die van der Merwes.

MAAK KONTAK MET ALLEN EN ANSIE

Allen selfoon nommer: +258 822684260

Ansie selfoon nommer: +258 824063769

Epos adres: mosambieksending@gmail.com

Ons het nog nie nommers vir RSA gebruik nie.

Na die 22e kan die ondersteuningspan in Klipfontein (0727869843) of die Welmans in Pretoria

(0828198392), of hulle seun Hennie (0827357207) gekontak word vir Allen en Ansie se selnommers.

KAMBODJA – Alta Glas

Uitreksel uit Alta se nuusbrief

Bediening

Begeerte om die Woord te leer ken oorskadu fisiese uitdagings ...

Die bediening is 'n fees en die mense se begeerte om te kom leer oor wat die Woord van God sê laat my klein voel. In een area moet die mense 2 uur in die nag begin reis (klein bootjie, motorfiets, ferry en dan 'n taxi op die hoofweg vat) om 8 uur by die sentrale opleidings area te wees. Hulle slaap dan een aand oor, onder 'n afdak, om so die 2 de dag se opleiding te kan bywoon – die siklus word elke 4de week herhaal.

Dié pastoor se hut hel al vir 'n paar maande agteroor, dit is glad nie veilig nie; dat dit so lank bly staan is 'n wonderwerk. Die ouens kan nie in sy hut slaap nie; hoe meer mense in die hut hoe meer gewig op die pale en hoe groter die gevaar dat dit omval. Ander ouens trap hulle fietse vir 2 ure in die oggend (ongeag van die weersomstandighede) en in die aand terug na hulle huise/families en mis nie een les nie.

Fisiese nood in die Christen familie ...

Daar is nood waar mens ook al gaan om opleiding te gee. Dit is nie net Pastoor Hai se huis wat enige tyd kan omval nie, maar Pastore se motorfietse wat met breë stroke 'masking tape' vas geplak word sodat die nie uit mekaar val nie. Dié is hulle vervoer om die Woord te verkondig. In baie van die areas is daar geen hulp vir weduwees nie, dit breek mens se hart om die stories te hoor en die lyding te sien. Terwyl die pastore onder mekaar gesels het, het ek hulle hoor sê dat daar sekere huise / areas is wat hulle amper so skuins skuins kop onderstebo wil verby loop omdat hulle hulpeloos staan voor die nood.

Die maand het ons 'n pastoor gehelp om 'n aansoek vorm in te vul en deur te stuur na Amerika vir donasies om die kinders in sy omgewing te help. Ten spyte van dié uitdagings is daar 'n aansteeklike vreugde waarby mens kan kers opsteek.

Veritas Kollege Kambodja as Sending organisasie geregistreer!

EFC (Evangelical Fellowship Cambodia) het ons aansoek aanvaar en ons is nou 'n geregistreerde sending organisasie in Kambodja. Dié grootste seën van dit alles is dat waar ons ook al in Kambodja gaan ons vryheid het om die Boodskap te bring en Christen leierskap opleiding te doen. Dankbaarheid vul my wese as ek sien hoe God self Veritas Kollege Kambodja vestig en anker, en vir die voorreg dat Hy my as instrument/pionier gebruik om dit te doen. Die Phnom Penh kantoor/opleidings area het te klein geword. Ons verhuis na 'n groter plek.

Stop ... moenie meer bid dat ons in al die provinsies sal werk nie!!!!

Die Khmer personeel bid deur die bank dat Veritas Kambodja na al die provinsies sal spre! Die aansoeke kom van oral oor en is meer as waarmee ons kan voorbly. Die areas/provinsies waar ons tans werk is Kampong Thom, Kampong Chhnang, Kampong Cham, Bantheay Meantchey en Phnom Penh. Waar die nuwe aansoeke vir opleiding vandaan gekom het is Kampot, Preah Vihear, Prey Veng, Svay Reing.

Wie is Veritas Kollege Kambodja / Wat doen ons?

DV Vanaf November sal jy al die inligting op die Veritas Kambodja Blogspot kan lees. <http://VeritasCollegeCambodia.blogspot.com/> Bid en loof asb. saam soos die Here jou lei terwyl jy die brief lees.

5de rat van my kar gesteel . . !

Ek glo dat jy ook al baie maal tye van vreugde/opgewondenheid en uitdagings hand aan hand ervaar het. Augustus was 'n maand gevul met sulke ervarings. Die opleiding in die villages was 'n fees en ek het dit baie geniet. Maar ... Vandat 'n garage my aircon 'probeer' herstel het, het my kar nie meer 'n 5de rat gehad nie. Ek het aangeneem dit is omdat daar aan die koppelaar gestel is of so iets en was glad nie voorbereid om te hoor dat die ratkas oop gemaak was en die 5 de rat verwyder/gesteel is nie. Ek kon nie verstaan hoe dit kon gebeur nie, het nie 'n clue gehad hoe 'n ratkas saamgestel is nie. Nou weet ek hoe lyk 'n ratkas en hoe die ratte bo-op mekaar inpas!!!!

Seën groete vir jou vanaf Kambodja

Alta

SENDING SONDER GRENSE (SSG) – Ds Leon Tait

Via Sending Sonder Grense word heelwat kinders in Ukraine deur lidmate van ons gemeente geborg. Die dame wat SSG se werk by die Afrikaanse gemeentes in SA bekendstel en borgskappe vir kinders/families in die arm oud-kommunistiese lande werf, het in Augustus vanjaar bedank. Ds Tait is gevra om vanjaar uit te help deur te preek en SSG bekend te stel by 6 Afrikaanse gemeentes waar daar reeds afsprake gemaak is. (Terugvoer : tydens hierdie dienste is daar vir 56 kinders en 2 families in Oekraïne en Moldawië borge gekry, asook R10000 se donasies – alle dank aan die Here daarvoor !!).

Ds Tait is ook deur SSG gevra om vanaf 2009 tydens skoolkwartale op die Sondagoggende wanneer hy nie by Rietfontein-Suid preek nie, by Afrikaanse gemeentes namens SSG te preek, 'n aanbieding oor SSG se werk te doen en borge vir kinders/families te werf. Rietfontein-Suid se Kerkraad het toestemming daarvoor gegee vir 'n 6 maande proeftydperk, beginnende Januarie 2009. Bid asseblief vir hom vir die maak van afsprake vir 2009 – die Here weet die beste wanneer hy by watter gemeente moet optree.

NAVRAE

Indien u enige navrae het oor die Sendelinge wat deur u en ons Gemeente ondersteun word, kan u die volgende persone kontak wat met spesifieke sendelinge kontak behou:

Corné du Plooy - Leon Tait

Mosambiek radiostasie/Allen en Ansie vd Mwerwe - Japie en Ena le Grange

Alta Glas - Chris en Eureka Botha

Gebedsketting + Laudium - Alet Briers

Gerdia - Pieter Meiring

Harold Weepener (Limpopo) - Elna du Plessis

Sendinggroete in Christus

SENDINGBEDIENING